

春秋林傳亨

春秋林氏傳

卷之三

明 莆田 林尊賓 著 門人 吳之璿 錄

莊公

元年春王正月

當其生也而不世子及其立也而不卽位端君本定世
系不可紊焉者也况繼弑乎

三月夫人孫于齊

孫于齊夫人志乎齊也志乎齊是亂乎齊也故去姜氏以見亂也孫于邾夫人羞乎齊也羞乎齊是不得已乎邾也故稱姜氏以別邾也

夏單伯逆王姬

秋築王姬之館于外

冬十月乙亥陳侯林卒

王使榮叔來錫桓公命

王姬歸于齊

齊師遷紀鄆鄆

遷之者取之也不言取爲莊公諱也桓之生也旦夕謀之爲而會爲而戰亦將有以全之也沒末年不保其三邑是墜父之志弱魯之威絕諸小邦之附也不可以不諱也

二年春王二月葬陳莊公

夏公子慶父帥師伐於餘丘

慶父專兵必目之曰公子言公之子也言公之子不知公之讐也帥師伐餘丘何哉於者失所於也有所於而不至而伐於此是失所於也

秋七月齊王姬卒

冬十有二月夫人姜氏會齊侯于禚

夫人孫矣何自而入之也不書入因孫而不入之也入則不可以言孫也入不書會又何書因孫而書會也胡爲乎孫也淫躬與弑知罪自避也旣知罪自避復淫亂

公行故來孫之會可以不書既孫之會不可以不書也

乙酉宋公馮率

三年春王正月朔會齊師伐衛

夏四月葬宋莊公

五月葬桓王

秋紀季以鄆入于齊

冬公次于滑

四年春王二月夫人姜氏享齊侯于祝丘

享者兩君之禮桓可弑矣莊又母之而不能以義絕也
則是桓莊皆無以爲君也姜氏儼然魯之君矣姜氏書
享罪莊公之不君也此可以言君道不可以言子道也
享不廟中而行何也於惠不可以爲婦於桓不可以爲
妻仰顧先靈愧罪何極不若祝丘荒且嬉耳

三月紀伯姬卒

夏齊侯陳侯鄭伯遇于垂

紀侯大去其國

危望扶敗思救紀之於魯是也邑遷鄆入所未忍一割
去者望魯而已使魯晏然充耳亦復何言乃次于滑東
手無爲是塞紀之責也且示齊以怯也泣五廟于榛蕪
絕萬靈于仇敵毋得旦夕延也聖人不罪其世守也仍
稱之侯焉曰大去其國傷其心而咎于魯焉

六月乙丑齊侯葬紀伯姬

伯姬者誰齊侯者誰傷其事而咎于魯焉

秋七月

冬公及齊人狩于禚

五年春王正月

夏夫人姜氏如齊師

秋郕黎來來朝

冬公會齊人宋人陳人蔡人伐衛

六年春王正月壬子突救衛

子突慨然奉王靈而下也王於是乎有人矣書王人重其爲王之人也

夏六月衛侯朔入于衛

秋公至自伐衛

螟

冬齊人來歸衛俘

七年春夫人姜氏會齊侯于防

夏四月辛卯夜恒星不見夜中星隕如雨

恒者常也常者不見變也不見何以見星隕也隕而後見其星也未隕也星不可見也星必待隕而後見變星

也非恒星也非恒星故只言星隕也星隕雨之何也星之嚙嚙其高懸而有曜也星之正色也星之所以恒也失其恒而隕則不可謂之星也故雨之然終不可謂非星也故星隕而如雨之唯不可謂之星而又不可謂非星星之所以不恒也恒星之所以不見也

秋大水無麥苗

無麥苗大水而無之也以秋大水而無之災之大也災必詳其始故無麥苗而繫之秋也

冬夫人姜氏會齊侯于穀

八年春王正月師次于郎以俟陳人蔡人甲午治兵

夏師及齊師圍郕郕降于齊師

魯之於齊不可一日其焉者也反助師而聽役抑云甚矣至郕降齊而不降魯郕固知有齊而不知有魯也魯無齊何其如郕何

秋師還

冷之也冷其中郕之制筭寂然而歸也亦諱之也諱其



供齊之馳役沓然而返也

冬十有一月癸未齊無知弑其君諸兒

九年春齊人殺無知

公及齊大夫盟于薳

夏公伐齊納糾齊小白入于齊

糾不公子明糾欲入而奪兄也小白不公子明小白先入而殺弟也均公之子而或奪或殺無貴乎公子之爲均也然小白齊小白也則齊固小白之齊也糾烏得而

納也

秋七月葬齊襄公

八月庚申及齊師戰于乾時我師敗績

九月齊人取子糾殺之

冬浚洙

十年春王正月公敗齊師于長勺

二月公侵宋

三月宋人遷宿

夏六月齊師宋師次于郎公敗宋師于乘丘

齊師主也宋師與也齊寔吾仇主兵謀我有心者正不
得不悉力以與相從事也方以雪天雎方以挫強敵若
宋則勝之可也敗之可也無足壯吾師也首舉齊師次
于郎獨書宋師敗乘丘所以耻魯忘雎而怯敵也

秋九月荆敗蔡師于莘以蔡侯獻舞歸

冬十月齊師滅譚譚子奔莒

君子以是知桓之不可南征也無救蔡之師有滅譚之

事是以終其身無能與楚角也

十有一年春王正月

夏五月戊寅公敗宋師于鄆

秋宋大水

冬王姬歸于齊

十有二年春王三月紀叔姬歸于鄆

夏四月

秋八月甲午宋萬弑其君捷及其大夫仇牧

冬十月宋萬出奔陳

十有三年春齊侯宋人陳人蔡人邾人會于北杏

北杏之會伯畧之始王道之終也是故惻然春不書王
不書王而侯齊何也王猶賴乎齊之侯也侯齊而人列
國何也列國從此皆齊人也知有齊不知有王也

夏六月齊人滅遂

秋七月

冬公會齊侯于柯